

外科症治全生集 卷之三

古吳林屋山人定定子王維德洪緒氏纂輯

吳縣潘 霽重校刊

同人 參校

夫用藥如用兵也。兵有勇猛。藥有燥烈。烈藥經製則純。勇兵經練則精。兵精破賊不難。藥純治病易愈。苟炮製不妥。猶勇兵之武藝未備也。今人不精於製。而視性之烈燥者。畏之如虎。反諉之曰。非徒無益。惟恐有害。予初讀藥性。繼攻炮製。然



藥之性。古今之議未遠。炮製之法。却有不同。予留心四十餘年。深得其法。用之功靈效速。萬無一失。始悉烈藥之力如勇兵。製藥之方如演武也。因古書獨於烈藥之處未詳。是以錄登是集。爲炮製之補遺云爾。

甘草

切三寸一段。水浸透。放鐵篩上。炭火慢炙。炙至汁將出。卽取離火。暫冷再炙。炙至草熟。去皮切片。熟者健脾和中。甘平之品。乃九土之精。生者化百毒。和藥性。潤肺。解瘡疽胎毒。利咽喉。

人參

補氣。獨入肺經。肺主諸氣。肺旺則四臟皆旺。精自生而形自盛。補中益氣。一切虛症要品。

黃芪

去心。蜜水潤炙。如入補腎藥。以鹽水潤炙切片。炙爲補氣藥。生有託毒功。

白朮於朮

浸一宿切片。土拌蒸透。去土勿炒。於朮浸刮去皮。飯上蒸。日晒數次。如棗黑。黃土炒。於朮之功。勝於白朮。乃中宮和氣補

脾之藥。

蒼朮

泔水浸。去粗皮。切片晒乾。土炒炭。治脾胃寒溼。消痰逐水。不
伏水土。止瀉痢霍亂。久服延年。

當歸

酒浸晒乾切片。上部用頭。中部用身。下部用梢。頭身活血。梢
破血。全用定血。引血歸經。除頭痛。和血補血。潤腸胃。筋骨皮
膚排膿止痛。

白芍



外科用酒炒。固腠收斂。

赤芍

消癰腫。破堅積惡血。下氣生肌止痛。

厚朴

去皮切片。每觔取帶皮生薑四兩。切片同煮。汁乾炒透去薑。溫中消痰。厚腸胃。除積冷宿血宿食。

丹參

色赤酒潤炒。血分藥也。補心血。養神志。生新血。安生胎。落死胎。爲胎前產後要藥。每晚酒送末二錢。連服四十日。可療痛。



經。卽孕。

元參

蒸晒。忌銅器。消癰。滋陰降火。利咽喉。通小便。

地黃

生用性寒。涼血滋陰解熱。水煮至中心透黑。然後每觔入滾陳酒半觔。炒砂仁末一錢。再煮。煮至汁盡。漚起晒乾。所漚原汁。仍入收盡。再晒乾。忌經鐵器。補陰壯真氣。生肌填髓。同肉桂引火歸元。療陰分虛虧。

牛膝

產川者佳。酒拌蒸則補。生用亦效。補腎。強四肢。產懷者下行。

麥冬

去心酒浸則補。湯泡則微寒。祛熱毒浮腫。洩肺中伏火。安臟心腹。

天冬

去心酒潤。治陽物不起。潤五臟。咳嗽消痰。降火。去風熱。煩悶。

茯神

安魂魄。養心血。治心神不安。

赤茯苓

破結氣。瀉心小腸膀胱溼熱。行竅行水。

白茯苓

蒸透切。逐水暖脾。生津止洩。除虛熱。開腠裏。

穀芽

啟脾進食。寬中消食。

麥芽

開胃消食和中。

苡仁

補肺益脾。去溼消水腫。理脚氣。

芡實

炒。治遺精濁帶。益精助胃氣明目。

杜仲

去皮。每觔用蜜三兩塗炙。蜜盡爲度。肝經藥也。補中益腎。補肝虛。堅筋強志。

肉桂

純陽之品。引火歸元。解陰寒凝結。去皮曰桂心。更純。桂枝性橫走手臂發表。

官桂



理陰分。解凝結。愈瘧疾。行血分。通毛竅。

川附子

昔產深山有毒。今民家栽種無毒。用水浸一二日。每宿易清水。浸去鹹味。麴裏火煨。切片晒乾。補腎肝陰虛。治中風癱瘓。陰陽疝氣。

大黃

每觔用陳酒五觔。煮爛晒乾。名熟軍。治燥結熱毒。清實火。下宿積。化停食。生熟功同。熟者純。

黃連

大寒治實火。凡痢疾目疾非實火。悞服致命。爲倒胃之藥。惟驚能療。解巴豆輕粉之毒。胡黃連性同。

黃芩

苦寒。風痰骨蒸。喉膽癰毒。養陰退陽。

香附

去皮。童便浸。水洗晒搗。醋鹽水拌炒。解鬱消癰。積聚痰飲。調經。

琥珀

用側柏子末。入瓦鍋煮。有異光取起。入燈心對分。研爲粉。清肺利小腸。安五臟。定魂魄。消瘀血。明目。

冰片

苦寒。治舌口咽喉火毒。研水調吞。治難產。

沙參

清肺火。益心。治久嗽。肺痿。消癰排膿。

苦參

泔水浸蒸切晒乾。主風熱蟲症。腸風血精。下痢。治大麻風。虛弱忌服。

松子仁

潤肺。治燥結咳嗽。同柏子仁。治虛閉。

柏子仁

甘平無毒。興陽道。益壽元。潤腸安神。

杏仁。性合。潤肺。口。火。昇。半。相。俱。丸。蘇。水。合。中。服。煎。膏。
去皮尖。除肺熱。氣逆。潤大腸。氣閉。

大麻仁

利大腸。熱燥。大便熱結。

乳香

每觔用燈心四兩同炒。炒至圓脆。可粉爲度。扇去燈心。磨粉。
用。消癰止痛。託裏護心。治遺精難產。

沒藥

製法與乳香同。破堅敗惡血。消腫生肌。墮胎去翳。

芸香 亦名白膠香

水煮三度。俟湯溫。手扯油淨。冷卽硬磨粉。解疽毒止痛。輕粉對研。豬油調敷爛孔。

樟腦

每兩用碗對合。溼紙封口。火昇半時。則成樟冰。治中邪腹痛。風痰。加花椒同昇。殺牙蟲。止牙疼。

丁香



辛温。治霍亂痞塊。吹鼻愈腦疳。反胃。開膈關。腹中腫毒。鼻中
息肉。乳頭裂破。

沉香

乾研末。或酒磨。以煎劑沖服。治腫毒。心腹痛。調中補臟益精
神壯陽。

松香

先取胡蔥煎陽。去蔥。以湯分三次煮香。每俟湯温。在湯內手
扯洗。其油去盡。冷凝磨粉。耑療溼瘋。治白禿。生入膏生肌。

木香

下降療腫毒。止吐痢。消積。止腹痛。統理氣分。

草烏

有烈毒。去皮取白肉。每觔用菜豆半升同煮。豆開花。去豆取烏。切晒磨粉。治風痰。手足拘攣。逐凝結。追筋絡。寒痰。開腠裏。以黑皮灰研醋調。治蛙髮癬。

川烏

功同附子。性緩。助陽。補命門不足。破積冷痢。

巴豆仁

研壓數次。油盡如粉。名巴霜。拔毒。孕婦忌用。

枳實枳殼

即細皮香圓。六月摘者實。八月摘者殼。陳蛀者佳。並去瓢核。以麴炒實寒。消食積。開胸結。殼亦寒。健脾開胃。止吐消痰。除裏急後重。

青皮

順逆氣。開鬱。解疔毒。

檳榔

健脾破結。療痢裏急後重。截瘧。

神麴